

Shiriki Habari Zake



SABATO MCHANA

Somo la Juma Hili: Mt. 28:18-20, 2 Pet. 3:18, 1 Pet. 3:8-15, Hosea 7, Zekaria 10.

Fungu la Kukariri: “Bwana MUNGU amenipa ulimi wa hao wafundishwao, nipate kujua jinsi ya kumtegemeza kwa maneno yeye aliyechoka, huniamsha asubuhi baada ya asubuhi; huniamsha, sikio langu lipate kusikia kama watu wafundishwao” (Isaya 50:4).

Ilikuwa asubuhi ya Sabato yenye shughuli nyingi kwa Mchungaji G. Alikuwa ameamka mapema, akijiandaa kwa ajili ya Shule ya Sabato na mahubiri, na pia alikuwa akiendesha mfululizo wa mikutano ya injili alasiri. Alichukua funguo zake, akatoka haraka mlangoni, na kuondoka kwa kasi.

Aliendesha katika barabara yenye msongamano wa magari mjini, akikasirishwa na watu wengi waliokuwa barabarani asubuhi ya Jumamosi, wakionekana kumchelewesha kwenda kanisani. Walikuwa wanaelekea wapi wote hao? Kisha, ghafla, gari moja likakatiza mbele yake. Alikanyaga breki kwa nguvu na kukunja ngumi kwa hasira na kumfokea dereva.

Hatimaye, Mchungaji G. aliwasili kanisani. Aliposimama ili kufundisha somo, macho yake yalikagua darasa lake na yakasimama katika sura ambayo haikuwa ngeni: dereva wa gari aliyemkasirikia dakika 20 zilizopita.

Baadaye, mshiriki mmoja wa kanisa alipomtambulisha dereva huyo kama mtu asiye Mwadventista aliyekuwa akitembelea ndugu zake, Mchungaji G. alitambua tena kwamba kila kutendeanana, iwe ni kwa watu tunaowajua au wageni, kunapaswa kujaa upendo unaotiririka kutoka katika uhusiano wa kudumu na Mungu. Huwezi kujua ni kwa namna gani matendo yako, hasa kama muumini, yanaweza kuwa na athari kwa wengine.

**Jifunze somo la juma hili ukijiandaa kwa Sabato, Juni 20.*

Kutokana na Mafuriko

Soma Utume Wetu Mkuu katika Mathayo 28:18–20. Andika ujumbe tofauti wa Yesu anaposema “wote” au “daima” (ambayo kwa Kigiriki ni neno moja *pas*).

Yesu alitupa agizo la kushiriki ujumbe Wake kwa ulimwengu: “Basi, enendeni, mkawafanye mataifa yote kuwa wanafunzi.” Utume wa Kanisa la Waadventista wa Sabato ni kuwafanya watu kuwa wanafunzi, ambao nao watawafanya wengine kuwa wanafunzi. Kwa njia hiyo, sote tunatangaza injili ya milele na ujumbe wa malaika watatu (*Ufunuo 14:6–12*) ili kuandaa dunia kwa ajili ya kurudi kwa Yesu kunakokaribia.

Kila mtu aliyepokea maisha mapya katika Kristo ameitwa kushuhudia. Hata hivyo, mara nyingi watu hufikiri kuwa kushuhudia ni jambo gumu au wasilotaka kulifanya. Unaweza kujiona ukihubiri mtaani au ukitoa somo gumu la Biblia, na ukatikisa kichwa chako: “Si mimi! Haiwezekani! Mimi ni mtu mkimya; kushuhudia si eneo langu nililokirimiwa.”

Hata hivyo, ushuhudaji wa kweli mara nyingi hutokana na kuwa shahidi wa kile ambacho Mungu anafanya katika maisha yako, kuona kile Anachokufundisha unapokua ndani Yake, na kisha kushiriki tu uzoefu wako pamoja na wengine. Mungu ni mwema sana, na kile alichokifanya kwetu ndiyo habari njema zaidi ambayo dunia hii inaweza kusikia. Hatuwezi wala hatupaswi kunyamaza! Amekukomboza; amekuita kwa jina lako—wewe ni Wake. Je, kuna habari njema zaidi kwa mtu yeyote mahali popote?

Ingawa wanafunzi wa kanisa la awali hawakuwa wamesoma katika shule za Kiyahudi au wenye ufasaha katika mapokeo ya simulizi, bado tunaweza kujifunza kutoka kwao.

Soma Mdo. 1:8 na Mdo. 4:13. Ushuhudaji ulikuwaje kwa kanisa la awali? Petro na Yohana walikuwa na mguso gani kwa wale waliowasikia wakishuhudia?

Petro na Yohana waliendelea kutangaza, “‘Maana sisi hatuwezi kuacha kuyanena mambo tuliyoyaona na kuyasikia’ ” (*Mdo. 4:20*). “Walikuwa pamoja na Yesu” (*Mdo. 4:13*) na walilazimika kushiriki. Roho Mtakatifu aliwapa ujasiri na nguvu ya ushawishi katika maneno yao.

Tumia muda katika maombi sasa hivi. Mwombe Mungu akupe ujasiri wa kumshuhudia kwa watu anaowaleta katika maisha yako. Mwombe hekima ya kujua wakati wa kushiriki na nini cha kusema. Soma 1 Yohana 4:7–11 na uombe upendo wa aina hii.

Pasipo Kulazimishwa lakini kwa Nguvu

Je, umewahi kujiuliza ni kwa jinsi gani Yesu aliweza kudumisha motisha ya kufanya kazi, kuponya, kufariji, kuhubiri, na kufundisha watu wengi siku baada ya siku? Tunaambiwa kwamba "Na alipowaona makutano, aliwahurumia, kwa sababu walikuwa wamechoka na kutawanyika kama kondoo wasio na mchungaji" (*Mathayo 9:36*). Upendo na huruma za Yesu kwa wanadamu ndivyo vilivyomsukuma kutenda. Vivyo hivyo, upendo wa Mungu ndani yetu unapaswa kutusukuma kuhisi mzigo wa kuwaongoza watu Kwake na kwa kweli Yake (*2 Wakorintho 14*).

Je, umewahi kutazama nyuso za watu usiowajua katika kutaniko la watu na kufikiri kuhusu umilele, ukijiuliza kama wanamjua Yesu? Je, umewahi kuhisi kile kinachoweza tu kuwa upendo wa Mungu ndani yako kwa mtu usiyemjua mwenye uhitaji? Upendo wa Mungu ndani yetu hutusukuma kuhisi mzigo wa kuwaongoza watu Kwake. Yereimia alieleza hili aliposema, "Ndipo moyoni mwangu kumekuwamo kama moto uwakao, uliofungwa ndani ya mifupa yangu, nami nimechoka kwa kustahimili, wala siwezi kujizuia" (*Yer. 20:9*).

Hata hivyo, tunapomshuhudia Mungu kwa wengine, kamwe hatupaswi kumlazimisha mtu kumpokea Mungu au ukweli Wake wa Biblia. Kulazimisha kunapingana na kiini cha tabia ya Mungu. Mungu hakuwalazimisha Adamu na Hawa kujitenga na mti wa ujuzi wa mema na mabaya (*Mwanzo 2:16, 17*). Hakuwalazimisha watu kuingia ndani ya safina ili waokoke dhidi ya Gharika (*Mwanzo 7:1*). Hakuwalazimisha Waisraeli kudumu katika agano lao pamoja Naye (*Kum. 4:29-31*). Badala yake, Aliwatimizia mahitaji yao (*Mathayo 4:23-25*) na kisha akawaalika kumfuata. Yesu hakumlazimisha mtu yeyote kumfuata Yeye wala ukweli Wake, lakini kamwe hatukatii tamaa (*Mathayo 23:37*).

Tunaposhuhudia, mbinu yetu inapaswa kila wakati kuakisi mbinu ya Yesu. Ellen G. White anasema, "Si sehemu ya utume wa Kristo kuwalazimisha watu wampokee. Ni Shetani, na watu wanaoongozwa na roho yake, wanaotafuta kulazimisha dhamiri. . . Hakuna ushahidi wa wazi zaidi kwamba tunayo roho ya Shetani kuliko tabia ya kuumiza na kuharibu wale wasiothamini kazi yetu, au wanaotenda kinyume na mawazo yetu." — *The Desire of Ages*, uk. 487.

Tunapaswa kujiruhusu kuwa vyombo vya huduma ya Mungu. Tunaishi katika dunia inayochukia ukweli, lakini uhalisia huo haupaswi kutuzuia kushiriki kwa njia ya busara na ya upendo. Kumbuka kwamba mara nyingi ushuhuda wetu binafsi ndio unaobeba uzito mkubwa, hasa katika hatua za awali za kushuhudia (*Ufunuo 12:11*).

Soma 2 Petro 3:18. Ni kwa njia zipi unakua katika neema na maarifa? Jambo hili linaonekana vipi katika mwingiliano wako na watu wanaokuzunguka?

Vidokezo kwa Ajili ya Kumshuhudia Yesu

Swali kwa kila mmoja wetu ni hili: Unamshuhudia Yesu kwa nani—mchukuzi wa posta, mwuzaji dukani, mtu unayemwona kila siku unapokuwa ukitembea? Mungu anamwita kila muumini kushiriki katika kazi hii, na anaahidi kukupa “‘ulimi wa hao wafundishwao, nipate kujua jinsi ya kumtegemeza kwa maneno yeye aliyechoka’ ” (Isaya 50:4). Ni wajibu pia wa Mkristo kuwa tayari kila wakati kutoa utetezi (apologia) kwa ajili ya imani na tumaini lililo ndani yetu (1 Petro 3:15).

Soma 1 Petro 3:8-15. Neno la Mungu linatuambia nini katika aya hizi?

Vifuatavyo ni baadhi ya vidokezo rahisi vya kuzingatia unapotafakari jinsi ya kudhamiria katika kumshuhudia Yesu kwa wengine:

- Mfahamu mtu na ujenge urafiki naye kwa muda. Wema, huruma, na nia ya kweli juu yake (kuwa “wa kupendeka”) vitamsaidia kuvutwa kwa Mungu. (Wengine huiita hili “uinjilisti wa urafiki.”)
- Omba Roho Mtakatifu afanye kazi katika moyo wa mtu huyo. Omba kwa ajili ya fursa sahihi za kuwasiliana naye.
- Tafuta njia za kawaida za kuzungumza kuhusu uzoefu wako wa imani au kumwomba. Mwombe Mungu akupe ujasiri lakini pia upole katika mbinu yako.
- Tafuta njia za kumuunganisha rafiki yako mpya pamoja na wengine kutoka kanisani kwako, ili aweze kupata fursa ya kuingia katika jamii ya waumini. Kikundi kidogo cha kijamii au cha kujifunza Biblia ni hatua nzuri inayofuata.
- Ombea mahitaji maalum au maswali ambayo rafiki yako mpya anaweza kuwa nayo, na tafuta fursa ya kumwonesha jinsi Biblia inavyotoa faraja, ushauri, na mwongozo katika maisha yetu. Unaweza kuanza kwa kushiriki ahadi moja ya Biblia au kujibu swali moja, jambo ambalo linaweza kufungua mlango wa majadiliano ya kina zaidi. Yaombe pia.
- Utafika wakati ambao utatakiwa kumwuliza rafiki yako kama angependa kuchukua hatua inayofuata (kujifunza Biblia na, hatimaye, ubatizo). Usiharakishe hatua hizi, lakini pia usichelewe. Omba kwa ajili ya hili.
- Matendo yetu yanapaswa kumfunua mmiliki wetu. Jinsi tunavyowatendea wengine katika maisha yetu itaonekana. Tabia zetu zinapoumbwa kufanana naye (kutakaswa), tutaishi kwa namna inayowavuta watu wote Kwake.

Mwana Mpotevu

Wengi wanajua kwa uzoefu uchungu na maumivu ya kuwa na mtoto ambaye—liche ya kulelewa katika nyumba yenye msingi imara wa kiroho—amechagua kuacha uhusiano wake na Bwana.

Efraimu, akiwa sehemu ya taifa teule la Mungu, alipotoka kutoka kwa Bwana. Hosea 4:17 na Hosea 7 vinatuambia nini kuhusu dhambi za Efraimu?

Zaidi ya hayo, tunasoma kwamba Raheli, bibi yake Efraimu, analia kisitiari kwa sababu Efraimu amecha uhusiano wake na Bwana (*Yer. 31:15*). Bwana anajibu huzuni yake kuu kwa maneno haya katika Yeremia 31:16, 17: “Zuia sauti yako, usilie, na macho yako yasitoke machozi; Maana kazi yako itapata thawabu, nao watakuja tena toka nchi ya adui. Tena liko tumaini kwa siku zako za mwisho, asema Bwana; na watoto wako watarejea hata mpaka wao wenyewe.”

Badala ya kulia kwa ajili ya mtoto wake aliyepotoka, Raheli anaambiwa awe na tumaini. Yeremia anatumfundisha nini zaidi? Soma Yeremia 31:18, 19.

Kupitia kisa cha Efraimu, tunajifunza kwamba daima kuna tumaini, kwa sababu Mungu hakati tamaa. Ingawa Anawakemea watu Wake waliopotoka mara kwa mara, huruma ya Mungu haikomi, na ujumbe Wake katika sura hii unaendelea (*tazama Yer. 31:20*).

Tunaweza kuhisi maumivu makubwa, kufadhaika na kukatishwa tamaa, au hata kusema mambo mabaya kuhusu wale walio karibu yetu ambao wameacha uhusiano wao na Mungu. Hata hivyo, Mungu anatukumbusha kwamba hajamsahau mtoto aliyetanga mbali—kamwe! Mawazo ya Mungu juu ya mtu kama huyo si ya muda mfupi tu, bali ni ya dhati na ya kweli. Kwa kweli, Mungu anasema kwamba moyo Wake unamwonea shauku mtu wa aina hiyo. Anatamani arudi Kwake, na rehema Zake ni nyingi.

Je, kujua kwamba huu ndio mwitikio wa Mungu kwa uchungu wa Raheli juu ya kupotoka kwa Efraimu kunakufanya ujisikieje kuhusu wale unaowajua ambao wameacha uhusiano wao na Bwana? Jambo hili linakupaje changamoto au linakutia moyo kwa namna gani?

Warudisheni

Wote tumewahi kupitia nyakati za udhaifu au kuyumba katika kutembea kwetu na Mungu—mabonde ambayo mioyo yetu haikuaminika au ambapo tulikuwa vuguvugu kwa muda mrefu. Ni kitu gani kilichokurejesha katika uhusiano wa kudumu pamoja naye?

Zekaria 10 inashiriki ujumbe mzuri kuhusu Mungu kuwarudisha watu Wake kwake. Soma sura hii sasa hivi polepole na uandike ujumbe mkuu.

Kwa namna halisi, kujua jinsi ya kuhusiana na kuwasiliana na mpendwa aliyeacha uhusiano wake na Bwana kunaweza kuwa changamoto. Unaweza kujiuliza jinsi mambo yanavyoweza kugeuka; unaweza kujiuliza jinsi ya kuwasiliana naye sasa kwa kuwa ana mtazamo tofauti; na unaweza kujisikia kufadhaika na kutokuwa na msaada kutokana na maamuzi mabaya ambayo bado anaweza kuwa anayafanya. Mawazo haya yataathiri kila wakati jinsi unavyomtendea mpendwa wako, na ndiyo maana ni muhimu sana kuishi na kuzungumza kutokana na wingi wa muda wako binafsi na Mwokozi wako.

Ushuhuda wa maisha yako, matendo yako, maneno yako, na maombi yako kwa ajili ya mwenzi au mtoto aliyekengeuka unaweza kubadilisha kabisa maisha na mustakabali wao. (Soma katika Luka 22:31, 32 na Yohana 21:15–17 jinsi maombi ya Yesu kwa Petro yalivyobadili maisha yake ya baadaye.) Kabidhi huzuni yoyote, hukumu, au shutuma unazoweza kuhisi juu yao, na badala yake mwombe Mungu abadilishe hisia hizo kwa upendo ambao ni Yeye tu awezaye kutoa. Mwombe Mungu akufunike kwa tabia Yake ili uweze kuonesha mtazamo wa upendo usio na ubinafsi. Kumbuka kwamba “hakuna mvuto mwingine unaoweza kuizunguka nafsi ya mwanadamu mwenye nguvu kama mvuto wa maisha yasiyo na ubinafsi. Hoja yenye nguvu zaidi inayoungana na injili ni Mkristo mwenye upendo na anayependeka.”—Ellen G. White, *The Ministry of Healing*, uk. 470.

Kupitia mfano wa maisha yetu thabiti yanayowaelekeza wengine kwa Kristo, wale waliomkataa Kristo wataona ndani yetu kitu ambacho kinatoka kwa Mungu tu. Wataona amani ipitayo ufahamu, upendo usiokata tamaa, na tumaini linaloamini hata kinyume na hali ilivyo. Upendo wa Mungu kwetu na kwa wapendwa wetu hautetereki kamwe. Tunaweza kutoa upendo huu, ambao tunaupokea kila siku, kwa wale wanaotuzunguka.

Waefeso 3:17–19 inatuhimiza kufanya nini?

Jifunze Zaidi: “Haidhuru uwe na taaluma gani, hakuna mtu mwenye upendo safi kwa Mungu isipokuwa ana upendo usio na ubinafsi kwa ndugu yake. Lakini hatuwezi kuipata roho hii kwa kujaribu kuwapenda wengine. Kinachohitajika ni upendo wa Kristo moyoni. Wakati nafsi inapounganishwa ndani ya Kristo, upendo hujitokeza wenyewe.”—Ellen G. White, *Christ's Object Lessons*, uk. 384.

“Wale wanaojishughulisha kwa bidii na kwa uaminifu wa moyo wote katika kazi ya kuwaleta watu kwa Yesu Kristo, ndio waliokomaa zaidi katika maisha ya kiroho na ibada.”—Ellen G. White, *Evangelism*, uk. 356.

“Nguvu ya kupinga uovu hupatikana kwa kujitoa kwa bidii kumtumikia Mungu.”—Ellen G. White, *The Acts of the Apostles*, uk. 105.

“Ili kuingia katika furaha Yake—furaha ya kuona roho zikikombolewa kwa dhabihu Yake—tunapaswa tushiriki katika kazi Yake ya kuwakomboa.”—Ellen G. White, *The Desire of Ages*, uk. 142.

“Wale wanaokataa fursa ya kushirikiana na Kristo katika huduma, wanakataa mafunzo pekee yanayowafanya kustahili kushiriki pamoja Naye katika utukufu Wake.”—Ellen G. White, *Education*, uk. 264.

Maswali ya Kujadili:

- ① Kwa nini upendo ni msingi na muhimu sana kwa aina yoyote ya ushuhudiaji wenye ufanisi?
- ② Uligundua lini kuwa kuongoa roho kunahusiana moja kwa moja na kutembea wewe binafsi pamoja na Mungu bila kuyumba?
- ③ Je, kuna msingi au uelewa wa msingi unaohitajika ili kumshuhudia Mungu kwa wengine? Ikiwa upo, unaweza kuwa upi?
- ④ Kuhusiana na suala la kuendesha mafundisho ya Biblia kwa mtu asiyeamini, ni wapi pa kuanzia? Je, lengo lako la awali ni lipi: kuthibitisha mafundisho fulani au kumwalika mtu kumjua Yesu?
- ⑤ Imba au sikiliza maneno ya wimbo “Redeemed!” (*Kitabu cha Nyimbo cha Waadventista wa Sabato, namba 338*) na tafakari juu ya njia unazotumia kuutangaza.

Muhtasari: Upendo wa Mungu na Neno Lake lililo hai na lenye nguvu vinapojaza maisha yetu ya kila siku, tutasukumwa kumpenda na kumshuhudia kwa wale wanaotuzunguka. Tunapaswa kuwa watu wa maombi, wenye kutafakari, na wenye kusudi katika kushuhudia, tukiamini kwamba Neno Lake, litokalo katika kinywa Chake, halitarudi Kwake bure, bali litatimiza mapenzi Yake, na litafanikiwa katika jambo ambalo amelituma (*tazama Isaya 55:11*).